

Contonschiu la finamira cun curascha e fetg bia perseveronza

Igl onn 2015 ei Karimi Shokrullah vegnius sco fugitiv en Svizra. Senza saver in sulet plaid tudestg eis el semess alla tscherca da lavur e ha la fin finala schizun eligiu la via digl emprendissadi. Sia finamira ha el contonschiu tier la Distec SA a Mustér: uss eis el mecanist da produczion.

HANS HUONDER/FMR

El mund modern senz'uiara san ins buca s'imaginar tgei ch'ei vul dir esser sutpost a represius ed attaccas militaras. Per biaras persunas ch'enqueran ina perspectiva resta savens pauc auter che da prender la via sut ils peis e serender en in mund pli empermettent. 2015 ha era *Karimi Shokrullah* (29) eligiu quella via ed ei arriavus en Svizra. El deriva dil contuorn da Karabach ella regiun Ghazni digl Afganistan. Da Kreuzlingen ha siu viadi menau el a Cuera e Domat e pli tard el center per requirents d'asil dil Bellavista a Mustér. Cheu ha el empriu tudestg tiel magister *Gion Tenner* e ha giu la caschun da far in fuffernadi d'in di ella Distec SA. Igl ei lu suandau bunamein dus onns da lavur ella cuschina en in hotel a Lai avon che Karimi Shokrullah ei seregurdaus da siu temps a Mustér e dil fuffernadi tier la Distec SA: «Jeu

hai lu contactau Gion Tenner e dumandau sch'el savessi empustir il contact culla Distec SA, jeu havessi interess da luvrar ni forsa schizun far igl emprendissadi leu.» Quei contact ei gleiti staus fatgs e *Pierino Bisquolm*, il responsabel pils emprendists ell'interpresa a Mustér, ha purschiu ad el la pussevliadad da far in fuffernadi da plirs dis.

Il lungatg sco crap da scarpetsch

Karimi Shokrullah ha lu entschiet cugl emprendissadi da polimecanist igl uost 2019. Suenter igl prem dils otg semesters eis ei denton semussau ch'igl ei buca pusseivel da cuntinuar. «Il tudestg – surtut per las expressius dil fatg specialas – era buca sufficients. Aschia havein nus cussegliu ad el da far igl emprendissadi sco mecanist da produczion. Gliez emprendissadi ei pusseivels cun meins bunas enconuschientschas dil lungatg», di *Pierino Bisquolm*. Mo era quei emprendissadi ha pretendiu da Karimi Shokrullah ina perseveronza nundetga. «Pils pensums ch'ils auters impundevan duas uras, stavel jeu sis uras vidlunder», di igl um giuven da lungatg persian e che ha giu absolviu en sia patria in studi d'econo-



Karimi Shokrullah (sen.) astga esser loschs: Egl examen final dalla pratica sco mecanist da produczion ha el obteniu la nota da 5,5.

FOTO HANS HUONDER

mia suenter ils 12 onns da scola fundamentala: «Damai che la translaziun via internet dil tudestg el persian ei buca adina exacta, stuevel jeu adina far la translaziun dil tudestg egl engles e da leu el persian per aschia capir ils plaid.» Giu da slignar ha el culs roms generals, ferton che siu studi d'economia ei staus d'engrau pils roms specifics per exempel cun matematica.

Terminau la partica cun 5,5

«Igl emprendissadi ha pretendiu dad el bia curascha e surtut fetg gronda perseveronza. Igl ei veramein stau ina prestaziun extrema. El ha denton giu l'ambiziun necessaria per contonscher la finamira», constatescha *Pierino Bisquolm*. El sco igl emprendist Karimi Shokrullah ein satisfatgs da quei temps intensiv. La pratica ha el terminau culla fetg buna nota da 5,5, la part teoretica ei era reussida, la nota vegn communicada ils proxims dis. In bien attestat survegn il giuven Afgan era da siu instructor ella Distec SA: «El ha luvrau fetg exact e schuber naven dall'entschatta, schegie ch'el haveva insumma negin'idea da quella lavur. El ha entschiet tier nulla, ei denton adina staus fetg

motivus. El ei era vegnius spert a frida cullas maschinas modernas.» Karimi Shokrullah che segida finanziamein cun sia famiglia – geniturs e tschun fargliuns egl Afganistan – resta el menaschi dalla Distec SA.

Contract da lavur naven digl uost

Naven digl prem d'uost ha el leu in contract sco mecanist da produczion, la lavur da turnar ei sia preferida. Ina da sias proximas grondas finamiras ei da seprofundar el tudestg ed engles e forsa era da cuntinuar cun in'ulteriura scolaziun. Tier la Distec SA ein ins leds e cuntents da mintga persuna scolada che sa vegnir engaschada. «Nus essan era satisfatgs da quels treis onns da scolaziun fetg specialas cun Karimi Shokrullah. Decisiva per ina tala prestaziun ei la motivaziun e quei ei era ina premissa per dar la caschun ad autras persunas digl exterior da far in emprendissadi», accentuescha *Pierino Bisquolm*. Ils indigens hagian igl avantatg dil lungatg, seigien denton per ordinari era pli versai en fatgs manuals. La motivaziun seigi lu tier enqual giuvenil buca adina ella dimensiun da quella da Karimi Shokrullah.